



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Palestine nungter tepuokdak talangtiba ayusang Israel-i chiokogo

Bhupinder-i PL nung mezungbuba Sikh nungter assistant referee kumogo



VOL. XX NO. 84 (ADOK 84)

DIMAPUR

ROGONÜ (FRIDAY)

ANEJETI (JANUARY) 06, 2023

₹ 5.00

## NSCN/GPRN (Khango) lenirtem mangatetep adoka lir

**Dimapur, Aenjeti/January 05 (TYO):** NNPGs, Working Committee, Co-convenor aser NSCN/GPRN-K (Khango) Ato Kilonser Isak Sumi ya Khango-Isak telok nungi shidak mangatetba nisung kari Thilixu village nung ceasefire office nung January 5, 2023 nü yiruts.

Iba sülen GBs aser civil society tem arua Isak sumi chioka liasü. Parnoki iba telok indang nok-nü densema ceasefire office ya ozüing alema agi, ta osang ka ajanga ashi.

Convener WC, NNPGs N. Kitovi Zhimomi-i Chairman, Ceasefire Monitoring Group (CFMG) dangi züluba shiti ka nung, Thilixu Village nung aliba NSCN/GPRN Cease-fire office nung mapa tamajung inyaker ket nungi tekeratiba nung nok-nü aser kuli kakat tem meshitsü shia liasü.

Isak Sumi ya Indo-Naga ken o jembiba nung kanga yakyaka shilem ahiba Co-Convener tem rongnung ka lir aser tazü mapa inyakba nisungtem payimi mesüra tashiyim amshia atsüngdoktsü aser parnok ket nungi nok-nü aser kuli kakat tem ajunga meyipa meshitsü ya WC, NNPGs mapa lir, ta NNPGs ajanga ashi.

Item nisungtem ya nok-nü bener Dimapur yutsü o Myanmar nung aliba NSCN (Yang Aung) telok nung adentsü sentong lir. Item nisungtem nok-nü bener jena aoba nungi nokdangtsü asoshi CFMG ajanga office ya lungbangtsüla aser tashiyim agi parnoki pua aliba danga züngsemtem chiokdaksütsü NNPGs-i ajungshir, ta ashi.

Maneni CFMG tetsüngtai aita Co-Convener Isak indang nok-nü aser kuli kakat tem ghonda 36 tsüngta meshitsüla, aji mesüra tashiyim amshia CF office agia aliba azüngtetsü asoshi WC, NNPGs

ajanga WC joint force amshitsü, ta ashi.

Telok indang collective leadership nungi temelaba makai inyaksangshi ta aija NSCN/GPRN-K (Khango) tir Khango Konyak-i par telok nungi tongti zülur Isak Sumi mapa nungi anentsü.

Khango-i sangdong ka nung ashiba agi, telok indang collective leadership-i memolungi Isak Sumi-i tashi ajak amshiba mechi mapa nungi anentsü.

Pai tashi aser maparen melemsatsü, kinunger-adianu, tembar aser metetepa alir busema pa sasa pa sorkar ama "yehzabo" nung aibelen ta aija liasü.

Isak ya pa indang tashi aser teinyaktsü ajunga nungi agienogo aser GPRN/NSCN-K nung maden aser tang nungi tenzüka pai inyaksangshiba nung telok maden, ta sangdong ajanga ashi.

Sumi mapa nungi anentsüba ya January 4, 2023 nungi tenzüker, ta pai ashi.

Kilonser, Tatar, Secretariat staff, army officers aser party nung inyakerdensema NSCN/GPRN-K indang lenirtem ajungben senden ka January 5, 2023 nü amendang NSCN/GPRN-K tir Khango Konyak-i constitution yimya mamshi aser Council of Kilonser nungi temelaba makai aser lenirtem shilem asem nung shilem ana medeni menüngdakba nisung kar mechi January 4, 2023 nü Isak Sumi mapa nungi anentsüba totuyuba agüja liasü ta ashi.

Parnoki tiri tashiyim amshiba aitsü aser iba totuyuba ya mali kumdaksütsü ta sangdongtsü pangjem. Tiri pa mapa nungi anentsüba totuyuba magienra teloki tir ya mapa nungi anentsütsü ajaki molunga pangjem, ta sangdong ajanga ashi.

## NDPP lenir kar BJP dangi meyiptsü molungtep

**Kohima, Aenjeti/January 05 (Agencies):** Brehostibar nikongdang Chümoukedima nung aliba Niathi Resort nung NDPP lenirtem aser BJP lenirtem tsüngta senden ka mena liasü aser NDPP lenirtemi saffron party nung adentsü molungtepogo, ta osang ajanga ashir.

Nagaland nung election ya February ita tatemlen mesüra March ita tetenzüklen agitsü lir.

NDPP working president aser party tenteter rongnung züngsem aser taoba chief secretary Alemtemshi Jamir, IAS (Retd) den NDPP Advisor T N Manen nungertemi anir NDPP nungi lenir kar

BJP nung adentsü molungtepogo, ta osang ajanga ashi.

NDPP lenirtem ya ano BJP nung adenba mesangdong, kechiaser parnok NDPP nungi ano manen, ta osang ajanga ashir.

Nagaland nung tang UDA sorkar nung NDPP aser BJP ya alliance partner lir. New Delhi nung taoba mapang senden ka amendang 2018 kum ama telok ana ya menden 20/40 lemsar assembly election nung tokteptsü lemteta liasü aser iba senden nung Union Home Minister Amit Shah, BJP tir JP Nadda, Assam CM Himanta Biswa Sarma aser Nagaland CM Neiphiu Rio nungertem dena liasü.

## Tanü Dimapur nung Jain nungter dokan shibangtsü

**Dimapur, Aenjeti/January 05 (TYO):** Jharkhand künbok Giridih nung Jain nungter asoshi temeshitiba tesem Shri Sammed Shikarji hill ya Centre-i tourist spot ka ama sangdonga sen aatsü asoshi lapoktsüba anema longkak aita Dimapur nung aliba Jain nungter meyong dokan ajak January 6, 2023 anepdang 6:00 ako nungi tenzüka ghonda 12 atema shibangtsü, ta sangdong ka ajanga ashi.

Dimapur nung aliba Shree Digamber Jain Samaj ajanga sangdong ka nung ashiba agi,

Jharkhand sorkari mepishiba ama Union Ministry of Forest and Environment and Climate Change ajanga telemtetba agiba anema Northeast nung Jain nungter temi longkak aittsü.

Akhi mapang nungi aliba temeshi tesem menentsütsüsa teshisadangba makai sangdongba asoshi longkak aittsü atema Dimapur nung aliba Jain nungter ajak Mahavir Bhawan nung anepdang 9:00 ako nung adenshitsu ayongzüker, ta Samaj ajanga sangdong ka nung ashi.

## Modi sorkari Frontier Nagaland atema legislature balaka molungogo: ENPO

**Guwahati, Aenjeti/January 05 (Agencies):** Advisor for MHA (Northeast) AK Mishra tekolakba sür Intelligence Bureau joint director Mandeep Singh Tuli aser Ministry of Home Affairs (MHA) northeast division director A K Dhayani nungertemi Eastern Nagaland People's Organisation (ENPO) lenirtem den senden ka Guwahati nung January 5, 2023 nü mena liasü.

Senotsü, judicial aser executive tashi densema frontier Nagaland atema legislature temeja ka agütsütsü Government of India (GoI)-i molunga agizük, ta ENPO züngsem Wangyuh Konyak-i ashi.

Ano GoI aser ENPO lenirtem

tsüngta senden tanabuba ya Guwahati nung January ita tanabuba hopta nung amentsü lir.

Osang ka ajanga ashiba agi, GoI-i Frontier Nagaland nungta taruba hopta sangdongtsü saka ENPO lenirtem January 6 nü Nagaland tonger mesangdong tsüngta parnoki shisadangtsü.

Kasa ya sangdongtsü atema Union Home Minister Amit Shah-i January ita tanabuba hopta nung Tuensang semdangtsü amai lir, ta osang ajangasa ashi.

ENPO ya kin tenet - Konyaks, Phoms, Changs, Khiamniungans, Yimchungrus, Tikhir aser Sangtams nungi lir.

Party dak sendakba maparen atema Home Minister-i January

6 nü Nagaland semdangtsü lir.

"Takangba ya 'Frontier Nagaland' nungta agütsür state temeja ka asoshi lir, kong dangar memenepeba district pezü aser Naga nungter kin tulu trok dena lir. Nagaland anüdoklen aliba nüburttem terenlok aser ajungtsü mechi iba maparen ya inyaker," ta ENPO tongti zülur Manglang Phom-i India Today dang ashi.

ENPO ya Eastern Nagaland nung state temeja ka ama Frontier Nagaland amenoktsü asoshi bendanga agütsür inyakba tribal council aser lokti tentet temi kumtetba ka lir. Taoba ita ENPO nungi lenirtemi Union Home Minister Amit Shah ajurua jembishinüa liasü.

## Nagaland state BJP leniri mi den asayar: WC, NNPGs

**Dimapur, Aenjeti/January 05 (TYO):** Nagaland nung teti asoshi yimjung alitsü atema centre nung aliba BJP sorkari Naga political groups tem den yimten ken o tangatetep kati arutsü asoshi jembia liasü saka Nagaland state BJP leniri mi den asayar, ta Working Committee, NNPGs indang Media Cell ajanga sangdong ka nung ashi.

Nagaland State BJP tir Temjen Imna Along den pa mesüker temi solution anema angatetba aser nokdakba ajanga Naga nungter yimten ken o jembiba nung terenlok aser süngjang atangba nung tetsükdaksü tulu agütsü. Nagaland BJP tiri jenbuttsü meranga tezü mekena aser temolung magütsba yimya amshiba ya tatok magütsütsüsa kumtagi. Pai kodanga Naga nungter asoshi jangja-jangja bilemba aser inyakba mesayudang, ta sangdong ajanga ashi.

November 9, 2022 nü WC, NNPGs ajanga State BJP tir dangi iba tongtipang ken o asoshi senden ka amentsü shiti zülua liasü. Saka tanü tashi telangzüba kecha maka aser pa tang tashi jenshia senzür. Temjen Imna

Along-i Naga nungter aser par party tamakok aludaktsüogo. Pa ya tangatetba tajung maliba, maongka bushiba aser shisatsü agi anünga aliba nisung, pai Naga nungter mashileni ani aser New Delhi nung BJP lenirtem ashioktsü. WC, NNPGs ajanga Naga nungter tenüng nung pa ama nisung ka Kohima mesüra Delhi nung inyaksangshitsü memelatsü, ta sangdong ajanga ashi.

1998 kum Congress party-i Naga nungter aginüba anema solution melen election agia liasü. Parnok den tokteper makai sorkar tenteta yimsü asü. Parnoki nüburttemi akhangba akumtsübo masü aser Nagaland nung danga regional political party ajunga madak takok angu ta amanga liasü. Naga nungter tasü ita parnok dang ainshitsü kishi sayu. Tejashitsüka tang tashi nüburttemi Congress party dak tamang makateti tim atemer. State BJP lenir mapa agizükba sülen pangsoa dangar mesüzüker aser külakoktsür Temjen Imna Along-i Naga Political Issue den asayamenüa Indo-Naga ken o jembishinü terenlok nung

tenokdangba agütsü. State BJP lenir dak ashikülak shisatsü aser yimya ajanga Naga nungter temolung lemteta aliba samadaktsüogo, ta WC, NNPGs sangdong ajanga ashi.

WC, NNPGs ya Naga nungter atema osangbener lir. Onoki nüburttemi aginüba aser jangraba ama GoI den ken o jembia arur. Naga solution nung teraksa adokdaksütsü amang sangwa metitemi inyakba kija aser telok balala WC-i jangjatetogo aser repranga arur.

"ELECTION FOR SOLUTION of 2018" politics tamakok ajuruogo. Naga kin aser civil society temi Indo-Naga political solution yongya lir. Ajaki akumtsüboa aser agizüktsüsa nüburttemi akangba ama yimten ken o tatem kati marui Nagaland nung election agira, Temjen Imna Along ama tilateri nung temolung agüja inyaksangshiba nisungibo temetetba Nagaland nungi BJP samatsütsü. 1998 kum ajungbena Congress tamakok anguba aser iba sülen temerenshi ajuruba mesük Nagaland BJP tejak nung repranga lir, ta WC, NNPGs ajanga ashi.

## Naga nungter ojang mesüshitsüla: K Therie

**Dimapur, Aenjeti/January 05 (TYO):** State nung tang yimsü tesüdak UDA sorkar ya temolung agüja inyaker asinungbo parnoki President's Rule akhangtsüla aser state assembly thinena atar yimten ken o mapa kuma inyaksüla, ta Nagaland Congress ajanga Brehostibarnü ashi.

Dimapur nung aliba Congress Bhavan nung osangbener den jembidang Congress tir K Therie-i, tang yimtenren tensa nung ajemdaker aser Union Home Minister Amit Shah aser Ato Kilonser Narendra Modi nati Nagaland semdangtsü alinung, ajaki asangsang nung mapa inyaksüla, ta ashi.

Union Home Minister aser ato kilonser nati state semdangtsü aliba ya election alitsü asü mesüra President's Rule alitsü asü mesüra nüburttemi ajungai yongya ataba political solution mapa kuma inyaksü asoshi amai Congress party-i asadangteter, ta pai ashi.

UDA sorkar nung temolung agüja inyakba lira parnoki Home Minister nem parnok mapa nungi anenba tezüluba nung agütsütsüla aser yimten ken o tangatetep kati arua mapa kuma inyaksü asüngdangtsüla, ta Therie-i ashi.

BJP ya ochi ashinungbo pari inyaksü molungtetba nung nokdaksüla, kechiaser ato kilonseri yimten tebilemstü

angatetepogo ta shia lir. Ram Madhav-i 2018 kum 'election for solution' ta ashi aser ano election arutar. Nagaland nung aliba BJP-i yimten ken o angatetepstü asoshi akangtsü tang ya mapang lir, aji mesüra UDA aser BJP dang ashikülaker ta ajatsü akok, ta pai ashi.

Government of India-ia nüburttemi terata nung metoktsütsüla. Ojang mesüshitsüla, ta pai ashi.

Political solution mapa kuma meinyak yur Naga nungter melungjem ta shia election anogo sangdongra ibaji Nagaland nung aliba nüburttemi asoshi nungdak makaba ka asütsü, ta ashi.

(Maneni tapak 2 nung...)

## H&FW Department ketdangsürtem den tepila sentong agi



January 5 nü Directorate of Health & Family Welfare nung mapa toktsüba ketdangsür Dr. K. Vikato Kinimi Principal Director, Dr. Thorhusie Katiry nung den tepila sentong agiba mapang tangokba noksa nung angur.

**Dimapur, Aenjeti/January 5 (TYO):** January 5 nü Directorate of Health & Family Welfare-i ayongzüka Dr. K. Vikato Kinimi Principal Director, Dr. Thorhusie Katiry Director, aser Dr. Z. KheshtoZhimo Addl. Director nung den tepila sentong agiogo. Ketdangsürtem den tepila sentong ya Dr. VibeitunuoMepfuo Director

(Health) lenisüba nung agi aser Jt. Director, Dr. Khelito-i lai zünger sarasadema liasü. Sentong nungsa NHM-i ken ka tena liasü. Y. Kikheto Sema (IAS) Commissioner & Secretary, H&FW-i o tatsüka jembi aser iba sülen taruba Principal Director, DH&FW-i kuli kaket aser sempet agütsüba mapang

achaayanga agi. Maneni sentong nung mapa toktsüba ketdangsürtemi tepila o jembia liasü. Mapa toktsüba ketdangsürtemi o jembiba mapang officers aser staff ajak dang parnok nem teyari agütsüba atema kanga pelaba lemsatep aser maneni longjemer inyaktüsü ajungshia liasü.

## Chumoukedima, Kohima aser Tuensang nung E- Roll sayaogo

**Dimapur, Aenjeti/January 5 (TYO):** Chumoukedima Districts kübok 4 -Ghaspani-I and 5-Ghaspani-II Assembly Constituency atema draft E-Roll, Deputy Commissioner & DEO, Chumoukedima, AbhinavShivam, IAS-i January 5 nü DC Conference Hall, Chumoukedima nung political party tem nem agütsüogo.

Kohima nunga photo electoral roll, special summary revision dak sendakba nung E-Roll tatembangbuba January 5 nü DC Office Chamber, Kohima nung publish süogo.

E-Roll sayaba mapang Deputy Commissioner & District Election Officer Kohima, Shanavas C, IAS-i, draft roll koba 2022 küm November 9 nü Kohima district nung Electors 1, 22,459 keter saya liasü iba roll nung elector 2519 bendenlokogo aser 1,297 aginogo aser electors 1,222 talila bendenlokba sülen ajak senteper E-Roll Electors 1,23,681 jungogo, ta metetdaksü.

Shanavas-isa, lepa reprangshiba mapang photo kasasa benoka aliba aika ngutetogo, kong Kohima kija nunga 9000 dak tema liasü aser item ya metongshitsü atema inyaktepar ta ashiba den political party tem dang iba ya

temulung dang ayutsü aser election tebandang kecha makai ochishia agitettsü atema Deputy Commissioner & District Election Officer tem den teka amteper inyaktüsü ayongzüka liasü.

DC & DEO-i, E-Roll tatembangbuba copy tem (hard copy & soft copy) political party tem nungi lenirtem nem agüja liasü.

Kasa mapang nung ADC & ERO Kohima, Rhosiotho Nguori NCS-i sangdong ka ajanga nüburtem dang, Registration of Electors rules, 1960 dak ajemdaker 8 - Western Angami, 9 - Kohima Town, 10 - Northern Angami-I, 11 - Northern Angami-II, 14 - Southern Angami-I aser 15 - Southern Angami -II Assembly Constituency tem indang E-Roll renemer aliba metetdaksüogo. Iba roll indang copy ka den amendment sangdongogo aser pa indang office nung Booth Level Officer ket nung angutsü, ta metetdaksü.

Maneni Tuensang nunga Deputy Commissioner & District Election Officer Tuensang, Nokchasashi-i Tuensang district kübok Assembly Constituency pezüprongla nung polling station

ajak atema electoral rolls January 5 nü DC Conference Hall (Circuit house) Tuensang nung sayaogo.

Sentong nung DC-i, political party tem dang election tebandang kecha makai merek agütsü mepeshia liasü. DC-isa, stakeholder tem dang SVEEP inyakyim nung shilem tajung agütsü aser taruba election takok nung agitettsü atema teka amteper inyaktüsü mepeshia liasü. Nokchasashi-isa, Booth Level Agent meshim aliba political party tem dang dang takaratiba nung shimtsü metetdaksü.

Kasa mapang nung DC-isa, 51-Noksen, 52- Longkhim-Chare, 53-Tuensang Sadar-I, aser 54-Tuensang Sadar -II Assembly Constituency tem atema 2023 küm January 1 ya qualifying date ama aser Registration of Electoral Rules, 1960 dak ajemdaker draft electoral roll renemba metetdaksüogo. Iba E-Roll indang copy den amendment sayaogo aser reprangdangtsü atema pa indang office nung angutsü ta metetdaksüogo.

Iba senden nung political party balala nungi lenirtemi shilem agi aser party ajak nem E-Roll copy kaka agütsüogo.



DC aser DEO Dimapur Sachin Jaiswal den political party balala nungi lenirtem January 5 nü DC indang conference hall nung E-Roll tatembangbuba sayaba mapang tangokba noksa nung angur.

## Congress tiri Screening Committee tentettsüogo

**Dimapur, Aenjeti/January 5 (TYO):** Congress tir Mallikarjun Kharge-i December 28 nü Meghalaya, Nagaland, aser Tripura nung taruba Assembly election atema Screening Committee tem tentettsüogo.

Nagaland nung committee ya Mohan Prakash tekolak ser

inyaksangshitsü aser pa den Sanjay Dutt aser Sankar Malakar na züngsem asütsü. Kasa mapang nung in charge Ajoy Kumar, state Congress tir K Therie, aser party national Secretary Ranajit Mukherjee nung ex-officio züngsem asütsü.

## Mkg Dist Welfare Officer ajanga sangdonger

**Mokokchung, 5th JAN (TYO):** National Scheme (NSAP) kübok shirnoksa Old Age Pension, Widow Pension, Disability Pension 2021-22 tsüngta Direct Benefit Transfer (DBT) ajanga teyari mengui lir, itempur asoshi ita trok (6 months) indang teyari arua lir aser ibaji 11th Jan. 2023 nungi tenzüka District Welfare Office, Mokokchung nung office mapang alemtsü, ta I. Mangliyanga, District Welfare Officer, Mokokchung ajanga metetdaksüogo.

Teyari agizüktsü temsüa alirtem shirnokisa bank account nungdakbatem magütsü lir, itempur ajaki pei bank account passbook photocopy bener arutsüla aser bank account malir nembo iba teyariji magütsütsü, ta kasa osang ajangasa metetdaksü.

Teyari agizüktsü atemaji tsüngtong maruteti temyonger yokertem asoshi, pei arogo nungi Pastor ajanga kuli (Life Certificate) sütsüba den Pension Payment Book nungdaksü, ta Mokokchung DWO-isa metetdaksü.

Tsükong/Yim/Ward yamai lemsar agütsütsü:

### I. TSÜRANGKONG

1. Chungtiyimsen, Longpayimsen, Watiyim, Medemyim, Aokum, Aosenden - 11th Jan. 2023
2. Aosungkum, Satsuk, Shaiphumi, Akukaiga, Moayimti, Vikuto - 12th Jan. 2023

### II. JAPUKONG

1. Mangkolemba, Japu, Longjemandang, Alongtaki, Lakhuni - 13th Jan. 2023
2. Changdang, Athuphumi, Nokpu, Aonokpu, Yajang A, B, C - 16th Jan. 2023
3. Lirmen, Akumen, Tsurmen, Saring, Longchem - 17th Jan. 2023

### III. JANGPETKONG

1. Khar, Molungkimong,

Yimchenkimong, Alongkima - 18th Jan. 2023

2. Changki, Nokon, Longnak, Merakiong, Molungyimsen - 19th Jan. 2023

3. Waromung, Chungliyimsen, Mongchen, Debuia - 20th Jan. 2023

### IV. LANGPANGKONG

1. Yisemyong, Mongsenyimti Vill & Comp., Pangsang, Longkong, Chakba, Yaongyimti Old & New, Salulamang - 21th Jan. 2023

2. Kangtsung, Wameken, Aopenzu, Anaki, Tuli, Luyong, Tzudikong, Chuchuyimlang Vill. & Comp, Unger, Akhoya, Asangma- 23th Jan. 2023

3. Changtongya/Yimsen & Town.Yaongyimsen Vill & Comp, Merangkong Vill & Town, Kelingmen - 24st Jan. 2023

### V. ASETKONG

1. Mopungchuket, Longpa, Chami, Kubolung, Khanimo, Sungratsu, Yimchalu, Alongchen, Longjang -25th Jan. 2023

### VI. ONGPANGKONG

1. Ungma, Kubza, Aletsu, Aolichen, Alichen, Mokokchung Vill & Compound, Longmisa, Chuchuyimpang - 27th Jan. 2023

2. Longsa, Meyilong, Moalenden, Chubayimkum, Longkhum, Mangmetong, Khensa, Mekuli- 30th Jan. 2023

3. Chungtia, Aliba, Kinunger, Sabangya, Longjongkong- 31st Jan. 2023

### VII. MOKOKCHUNG TOWN

1. Arkong, Aongza, Alongmen, Alempang, Artang, Penli, Majakong, Mongsenbai, Kumlong, Lijabalijen -1st Feb. 2023

2. Sangtemla, Salangtem, Sungkomen, Yimyu, Marepkong, Kichutip, Dilong, Tongdentsuyong -2nd Feb. 2023

## Naga nungger ojang...

(TAPAK 1 NUNGI...)

Nagaland nung aliba Naga nungger asoshi NNPGs temi Agreed points zülutepogo aser sovereignty mesüra integration malitsü asünungbo asenoki ano ken o jembishiniü ka asoshi atatsü menüngdaker, kechiaser Nagaland nung solution ana mapa kuma meinyaktetsü, ta NPCC tiri ashi.

Nagaland nung aliba Naga nungger asoshi iba tezüngzüktep nung aliba ama NNPGs temi zülutepba Agreed Points ya mapa kuma inyaktetsüla, aser Nagaland alema oa aliba Naga nungger temi mapang tali aginüra, ajibo parnok aser GoI molung, ta ashi.

Saka parnok Nagaland of Nagaland indang jembia mekazütsüla.

MLA 60 khuret lir, kechiaser

parnoki political solution aser Frontier Nagaland atema ahangba mapa kuma inyaktüsü atema telemtetba magiteteter, ta Therie-i ashi.

Congress-i ENPO dang parnoki ahangba shisadangtsü ayongzükgogo, kechiaser asenok tsüngta telemsa alitsü kanga ilara lir. Asen azü aser asentsü sena asen state angu aser asenok külemi timtemogo, anungji onoki telemsa maginer, ta ashi.

Congress-i Government of India dang Nagaland nung telemsa adoktsü asoshi mebilemstü saka ENPO temolung machiba reprangtsüla aser tanüngba state den külemi nokdaksüsa parnok nem kasa temeden agütsütsü ajungshir, ta paisa ashi.

# Tashiyim amshia nisung aienshidaktsütsü makok: SC



January 05, 2023 nü Uttarakhand kübok Haldwani nung alirtemi longkak aitba noksa nung angur. Haldwani nung kibong 4,000 dak tema aienshidaktsütsü atema High Court-i railway ketdangsertem dang tuyuba sülen iba tetuyubaji anema Supreme Court nung temepishiba ken o agüja lir.

## New Delhi, January 05 (Agencies):

Tawa Uttarakhand Hingh Court-i Haldwani kübok Banbhoolpura area nung railway meyong ali acre 29 nung kiojen azüngtetsü aser kibong 4,000 dak tema aienshidaktsütsü tetuyuba agütsüba obendang anema Supreme Court nung temepishiba ken o ka agüja liasü; ajioda Brihostibarnü Supreme Court-i high court tetuyubaji soita yuogo.

Supreme Court-i, item area nung alirtem temeden junga masadangi nisung jenti tashiyim amshia aienshidaktsütsü makok, ta metetdaktsü.

Yangji alirtemi ashiba agi, ali acre 78 area nunggi voters 25,000 shi lir aser yangji alirtem rongnung tanur 15,000 densema kanga tantsür-tamburtem aser mashisa tsürtem aika lir.

Justices- SK Kaul aser AS Oka nati, iba ya meimchir temeden dak sendakba onük ka lir aser parnok aienshidaktsütsü aser teyari agütsütsü atema lenmang karbo bushitsüla, ta ashi.

"Nenoki lenmang karbosa bushitsüla," ta Supreme Court-i Indian Railways dang ashi.

Supreme Court-i iba ken o ya maneni February 7 nü angadangtsü.

Uttarakhand Chief Minister, Pushkar Singh Dhama-i, "Onoki tamalena iba li ya railway meyong ta shiogo. Court tetuyuba nung ajemdaker onoki inyaksü," ta ashi.

December 20, 2022 nü Uttarakhand high court-i railway meyong li nung yangluba kiojentem bendoktsütsü atema tetuyuba agüja liasü. High Court-i railway ketdangsertem dang,

ozüing alema railway meyong li nung asüba kiojentem bendoktsütsü atema hopta ka jelia yangji alirtem nem osang metetdakjang, ta tuyua liasü.

Ajisüaka yangji alirtemi, parnok ket nung kuli kaketem lir aser tesüiba küm 100 dak tema parnok yangji lia arur, ta ashir.

Mongolbarnüa Banbhulpura area nung alirtem jagi candle amer longkak aita jaja liasü. Iba area nunggi tekülem kitem lir, schools, shishilembaba tesemtem aser ki aika lir, ajisüaka item kiojenji ozüing alema railway meyong ali nung asüba lir, ta railway ketdangsertem metetdaktsü.

Taoba mapang Uttarakhand chief minister, Harish Rawat-ia parnok pusema Dehradun nung ghonda ka shi sorkar anema longkak aita liasü.

# Centre sorkari MGNREGS atema senotsü lezmüktsütsüla: Mamata

Sagar Island, January 05

(Agencies): Central team anati West Bengal semdanga PM Awas Yojana-Gramin (PMAY-G) scheme kübok asüba kiojentem asadangba sülen state Chief Minister Mamata Banerjee-i, Centre nung BJP-i aniba sorkari politics asayaba anener Mahatma Gandhi National Rural Employment Generation Scheme (MGNREGS) atema senotsü lezmüktsütsüla, ta ashi.

Bodhbarnü Mamata-i South 24 Parganas district kübok Sagar Island semdanga taruba Gangasagar Mela atema terenemshiba asadangogo.

"Ni yagi politics asayatsü atema masü saka Kapil Muni Ashram semdangtsü atema aru. Centre sorkari politics asayaba anentsüla. Centre dang anogo 100 scheme atema senotsü lezmükjang ta takhangba agütsüogo," ta lai

ashi. Centre nungi ministry of rural development ketdangsertem team anati Purba Medinipur aser Malda district na semdanga yangji PMAY-G kübok asüba kiojentem reprangogo.

Taoba ita PM Awas Yojana kübok state nem senotsü lezmüktsütsügo.

West Bengal sorkari iba scheme kübok anogo 100 mapa inyakba atema senotsü lezmükjang ta takhangba agüja arudar.

Hopta ana tejaklena Union home minister Amit Shah den senden amenba mapang nung Trinamool Congress (TMC) tongti, Mamata Banerjee-i Shah dang iba scheme atema sen lezmükjang ta mepishia liasü.

Lok Sabha senden nunga TMC general secretary, Abhishek Banerjee-i iba onük süoka liasü.



January 05, 2023 nü Mumbai nung India International Jewellery Show - Signature 2023 tenzükba sentong nung Union Minister of State for Commerce & Industry, Anupriya Patel-i jembidang tangokba noksa nung angur.

# Media-i sensakeri süoshi teshisa asema meshisadanger: Rahul

Baghpat (Uttar Pradesh), January 05

(Agencies): Congress MP, Rahul Gandhi-i, osangbenertem atema Bharat Jodo Yatra nung shilem agir sensakertem aser aayangertem süoshi teshisa asema dang nungibo pai T-shirt asemabaji tongtibangba kümogo, ta ashi.

Shidakba agibo osangbenertem, kechiba asükwa mongpu nung sensakertem sweater mesüra jacket masemer ta shisadangtsüla, ta pai ashi.

Bodhbarnü Baghpat-Shamli arrtsülen Baraut nung lokti den jembidang Rahul Gandhi-i, "Ni yatra nung T-shirt semer jajar. Yatra nung sensaker aluyimertem aser aayangertem chirnurtemi süoshi teshisa semer kü den jajar, ajisüaka asükwa mapang sensaker aluyimertem aser aayanger chirnurtemi sweater aser jacket masembaji osangbenertem meshisadanger," ta ashi.

Taoba mapang Congress Tir Rahul-i, party-i 'Bharat Jodo Yatra' ayonga agiba ya nisungtem melungjang nung tetsübu indoktsütsü aser jenjang atuba den mapa manguba tebilemtsü onüktem sangdongtsü atema lir, ta ashi.

Agneepath scheme atema BJP-i aniba Centre sorkar aija Gandhi-i, "Tmalenbo lanurtemi

Army nung küm 15 tenzuka liasü aser pension angu, saka Narendra Modi-i pension agientsü, training ita trok agütsütsü, prangpong amtsü, küm pezü sülen agientsü aser mapa mali akümtsü atema apitet. Iba ya Hindustan tasenba lir," ta ashi.

Brihostibarnüa Uttar Pradesh kübok Shamli's Ailum yimdak nung Bharat Jodo Yatra maneni agi aser January 6 anepdang Haryana nung tanaben ayaoktsü.

Bharatiya Janata Party asalentongji linük nung lanurtem, aluyimertem aser aayangertem tsübudaktsütsü atema lir, ta Rahul-i ashi.

"Lanurtemi iba scheme (Agneepath scheme) anema longkak aitba mapang Modi-i, nenok noksa tangokra (longkak aitba mapang), nü nem sorkar mapa magütsütsü ta ashi. BJP asalentongji linük nung lanurtem, aluyimertem aser aayangertem tsübudaktsütsü atema lir," ta pai ashi.

Bharat Jodo Yatra ya yaküm September 7 nü Kanyakumari nungi tenzükba sülen Tamil Nadu, Kerala, Karnataka, Andhra Pradesh, Telangana, Madhya Pradesh, Rajasthan, Maharashtra aser Haryana nung agiogo aser tatemsa Jammu & Kashmir nung tembangtsü.

# Bendanglen nungi arur nisung 11 dak Omicron Sub-Variants putet

New Delhi, January 05

(Agencies): Yaküm December 24 nungi taküm January 3 tsüingda bendanglen nungi arur nisung 11 dak Omicron sub-variants putetogo; item variants ajak ya India nung tamalena puteta liasü, ta Brihostibarnü ketdangsertem metetdaktsü.

December 24, 2022 nungi January 3, 2023 tsüingda linük nung bendanglen nungi arur 19,227 dak coronavirus tendang aser parnok 124 dak Covid puteta parnok ajak isolation nung ayu.

Coronavirus positive putetba samples 124 nungjagi genome sequencing agiba results 40 XBB liasü, sample 14 nung XBB.1 aser sample ka nung BF 7.4.1 liasü.

Union Health Minister, Mansukh Mandaviya-i linük nung sensotem dang nüngdak makaba nung maoksatsüla ajisüaka kanga kümküma aliba den külemi sorkari tuyubatam shidak bentsütsüla, ta metetdaktsügo.

India nung tesüiba ghonda 24 tsüingda nisung 188 dak

coronavirus putet aser tang teshirangdakpur 2,554 dang kümogo, ta Brihostibarnep Union health ministry-i metetdaktsü.

Tang tashi nung India nung nisung 4,46,79,319 dak coronavirus putetogo aser tesüiba ghonda 24 tsüingda nisung asem asüba densema linük nung iba tashidak agi nisung 5,30,710 süogo.

Tang linük nung anogo shia coronavirus putetba shilemji 0.10 lir aser hopta shia positive putetba shilem 0.12 lir, ta health ministry-i metetdaktsü.



January 05, 2023 anepdang Kartavya Path, New Delhi nung Assam Rifles sepaitemi Republic Parade 2023 atema renemshidang tangokba noksa nung angur.



## TIR YIMYIM YIMOBILEM (EDITORIAL)

DIMAPUR ROGONÜ, AENJETI (JANUARY) 06, 2022

### Covid mesen tasen pokteter

**C**ovid wara ya tanener masü saka poktetpet pokteter, anungji asenok ano taoba kümtem dang nungi tekümdangba alitsüsa kümogo. China nung taoba ita tashi government-i Covid wara nokdangtsü asoshi nübortem pei onüleri moudaktsüi nokdanga liasü saka nübortemi timtem marem longkak aitba ajanga Covid wara nokdangba inyakyim ajak agien. Iba sülen, China nungisa Covid mesen tasen tapu balala pokteta parnok timtemba asenoki angashir aser joko alima tesem balala nung iba Covid mesen tasenba koba dang Omicron BF 7 ta ajar, iba mesen agi nisungtem amokmerenba asenoki angazüker. 2020 küm asenoki China lima nung Covid-19 tashidak agi nisungtem asüba angudang, iba tashidak wara jagi asenokbo matongtsü amai bilem, anungji parnok asoshi dang aria bilema sarasademtsü saka asenok sarasadem mesüzük dang kasa wara agi asen lima tonger liasü. Kasaji tanüa ataloktsü menua mali. Asenok asoshi kanga tekümdangtsü kaji, joko Kolkata tashi nung iba Omicron BF-7 tashidak wara agi nisung pezü dak atongba asenoki angashir. Itemji tawa to America len nungi arurtem liasü aser parnok dakji Covid mesen tasenba omicron BF keta lir ta putetogo. Item denji külemi alirtem daka iba tashidak mesen keta ali mali, itemji tendanga repringdagi. Kolkata tayimtsü anendak ya ajak asoshi kanga tongtimbang tesem ka lir, anungji taoba ita nungi bendanglen nungi arurtem dakbo Covid mesen keta ali mali tendanger aser metsütsüi taoba hopta nung nisung ana dak Covid mesen keta aliba puteta liasü. Iba tensaji kodang bilemdangdir, metendanger dang ashi asen lima nunga iba Covid mesen tasenba omicron BF-7 keta alirtem aika alitsüa akok. Tanübo alima ya, shitakba, yimtsüng ka amai dang lir, anungji yimpang nung atalokbaji tang yimlanglen ataloker, Kasaji, yashi China nung tashidak mesen tasen ka poktetba, tanübo America aser Japan tashi prokshia oa alima ayimsüngogo. Aji oda, asenok asoshi Kolkata yabo onasara anameta, ghonda ana lenmanga masü. Anungji, anogo shia nisung noklang ana - asem amenba tayimtsü anaben asemben Delhi - Kolkata aser Nagaland tsüngda jajadang oli orarterem jagi tenük agi manguba tashidak mesenji menar arua alitsü südi ta bilema, asenok ajak kanga kümdera alitsüba mapang ka agi tongogo. Atangji, Covid tashidak nungi jenbua alitsü asoshi teinyaktsütem ya mapa kanga tasakbo masü. Kima yimdong nung jajadang sü agi teni tebang nembanger senzütsü, akok tashi mesalemteptsü, sapon amshia teben teti shidoka alitsü, lokti adenshiyonga nungtepa mamentsü aser temang tashi itta alitsü atema akok tashi tzü ajemtsü aser shi ango dang masü saka süngolemba aser süngjanglijang peria achitsü aser temang arakzua mapa inyaktsü. Atangji, item teinyaktsütem yabo Covid tashidak maliyonga inyaktsüba ser nung asenoki meinyaker. Aji oda, asen lima ama nungbo sü agi teni tebang nembanger senzüba agi asen bang nungi teshinem adokba nembangtsü aser auyi nungia kümzüksü. Iba denji teben dang masü saka temanga dena merükmejua aliba agi tanga tashidaktem nungia jenbutsü. Asenoki jungjunga bilemdangra, asenok metsümeshiba sülen teben junga meshidok ser tangar den salemtepsa aser chiyongtsü bena arua achiba ajakji kanga tesempatsü mapatem lir. Iba amaji asenoki mebiledangi inyakba ajanga asenok dang masü saka tangar daka tashidak menaloktsür. Aji oda, asenoki tajunglen bilemdangdi süra, Covid ya asenok asoshi tesayur tajung ka amai lir, kechiyong iba yagi asenok dang loktiliba nung benshia aotsü yimya awashi tajung aika sayur. Atangji, Covid tashidak wara ya tsüba mapa meinyak kidang amongtsübaji tamashi mapa asütsü aser ano külen Covid wara metsümbui mashi alitsübajibo lendong mapa lir. Anungji, tang ama ano Covid wara mesen tasen tasen pokteta asenok amokmerendang, asenoki asen temang amshi meteta, tangar nem asen yaridaktsütsüsa masü saka asenoki tangar yaritettsüsa alitsübaji tongtimbang asütsü.

## OLEMSABANG

### AROGO NÜJISO ANÜKO ASER NEPORMEYONG ANÜKO (CHURCH INDEPENDENCE DAY AND REPUBLIC DAY)

~ Talitemjen Imchen

Aor sobaliba nong, aier asangor kati ka dak meimtepa, kipong akümtsü melongtepa liaka, kipong nong pei pei tsürabor dang metetdakja, memelongtep tashi tena kipong akümtsü asoshi temeden masü. Yamaji Aortem tsüma lenden nong küm aser mapang palala nong tsüsenba nepotem liaka, Naga lima limapor tekülem yimsü alidak litsü nong züngsemtem tsüsenba koli mali tashi Naga nonger asoshi arogo nejiso masü.

22nd December 1872 küm Dr. Edward Winter Clark-i Molungkimong yimdak, tamanger par ter pongo (15) tsüsentsüba ji arogo denzüka otsü lir. Naga lima, ano tammang lima, tangatetba aser temetetba nonga tazü. Atetasü jenti aki sünger liaka, par ter pongo-i item ajak ji kokteter, temelong oloa Christian yimsü akizükteta tsüsenba ji, ABAM küpok lim arogotem aser ABAM nongi jakzüka/raloka aor arogo ajak asoshi arogo tamendakdak (church foundation) ji lir.

ABAM küpok lim arogotem aser ABAM nongi jakzüka/raloka aor arogo ajak asoshi 22nd December 1872 anüko ya nüjiso anüko (Church Independence Day) lir. Yisu Khrista-i menenpor asoshi Kodak nüjiso alangzük, iba osang tajong Dr. Clark-i taküm bendanga akütsür, pa asameyang tajong ajanga, asen dangi aroa angatetdaktsü. Asenok asoshi Dr. Clark ya arogo tebo ji lir (The father of Church).

22nd December 1872 nongi denzüka, arogo palala nong tamangertem züina akümer aser tsüsenba züngsema timba küma aor. Saka tamanger telok koma lirometema külemtsü aser temeden alitsü, tebentet ka melii dang lia aro.

Ao Mungdang tang koba Ao Baptist Arogo Mungdang ta tenüng tabensaba melenshir ajar, ibai mezüng 1897 küm Molungyimsen yimdak March ita 12th- 14th anüko tashi among. Ao Mungdang mezüng amongdang, yim ter asem (13) nongi züngsem semer asem (33) adenshia, Missionary kipong asem densemer among.

Mungdang nong Mendenpoba Missionary S. A Perrine aser Tezüloba Wapong Kilep tena tanishir küpok, Christiantem koma külemtsü aser temeden lia libalirotsü, telok nong pangzüng ter (10) yanglo.

1. Anepdang shia sarasatemtsü.
2. Yim ajaklen osang tajong yoktsü aser kaket shisatsü renlokaktsütsü.
3. Tanela temeshi aser Yisu Khrista den temeimtep.
4. Christiantem-i Tsüngrem yimli asoshi akütsüba.
5. Tebor-i tebenrem sü melena dodhi akitsü aser tetsürtem-i sari akitsü.
6. Tetsürtem-i teptsü mateptsü.
7. Kani ajiba aser yi ajemba nongi pilatsü.
8. Christiantem-i pei ki aser temang merüka ayotsü.
9. Tanor ajak kaketrijo (school) züngdaktsütsü aser
10. Christiamporambo tasü mang ali tor aremstsü.

ABAM küpok lim arogotem aser ABAM nongi jakzüka/raloka aor arogo ajak asoshi, 12th- 14th March ita 1897 anüko ya nepormeyong anüko (Church republic Day) lir.

Asenok limapor aliba mapanga, tasür tanela kümzüka alitsü kanga metsüngareta amangba yimsü ka lir. Tatsü küma angatetsü aki, limapor yimsü ya kanga tasak, saka Dr. Clark-i bener aroba yimsü yabo kanga pongpar. Yimsü anaperongla alizüng ranglok ji, tasür tanela koda kümzüker tesünep aser tepeladak lima alitsü iba ji lir.

ABAM küpok aliba lim arogotem ajongba aki na aser ni Kodak-i aotsü masü mesüra ABAM küpok aliba lim arogotem majongba aki na aser ni Melomi aotsü masü. Iba jaki angateter Tsüngrem ji telok Tsüngrem masü kija Tsüngrem lir. Tesasatsü ka dang asenok küm noklang ka ser tenem tashi amanga aror, saka ano tamanger aika long nong poktetba nong tamang akar lir. Tatem anüko obendangdak na long nong apok ta Yisu tsüngdang nokdangdang, Yisu-i ajongli aki yangloritem dang Kodaki anioker ta langzura, takoksa koda tolo asütsü. Asenok ajak Laishiba nong aliba ama lirometema amangtsü kanga tenüngdaktsü.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Pope Benedict den tatembangbuba asüpila sentong agiogo



January 05, 2022 nü Vatican nung Pope Emeritus Benedict XVI asüpila sentong nung tangokba noksa nung angur.

**January 05, 2023:** Brihostibarnü Pope Francis-i ketdangsüa Pope Emeritus Benedict XVI den tatembangbuba asüpila sentong agiogo.

Pope Benedict ya Bavaria, Germany nung aso aser pa December 31, 2022 nü alima nungi pila; pa arrshi küm 95 liasü.

St. Louis Post-Dispath ajanga ashiba agi, Catholic lenirtem rongnung tesüiba küm 600 jungnüa

Arrshia taküm ali tashi yimsü asüba yimya raksabaji pa ya mezüngbuba Pope lir.

Ajisüaka Pope Benedict XVI arrshi küm 85 aliba mapang pai pa nem nungloktsüba mapa jeta meinyakteter, ta shia menden nungi anen.

Pope Francis-ibo Benedict-i inyakbaji kanga tasütait mapa ka lir, kechiyong ibaji ajanga tanga Pope temia kasaji inyaktsü atema kishi lapoktsür, ta ashi.

B r i h o s t i b a r n ü tatembangbuba asüpila sentong agitsü jakdang Hombarnü Benedict mangji St. Peter's Basilica-i bener oa liasü.

Benedict-i pa asüpila sentongji tongmelang agi dang

agitsü mepishia liasü aser alima lenirtema kar dang jaoktsü mapishia liasü.

Pa asüpila sentong nungji linük balala nungi tekolakpurtem liasü aser parnok rongnung Ato kilonser pezü liasü. Asüpila sentong nungjisa taoba mapang Spain Queen Sofia, King Philippe of Belgium; Queen Mathilde of Belgium; Italy Ato kilonser Giorgia Meloni aser Italy Tir, Sergio Mattarella nung liasü.

Asüpila sentong nungji Sistine Chapel choir-i ken aten.

# Open Doors US CEO-i Global Christian Relief tenteter

**January 05, 2023:** Open Doors USA CEO, David Curry-i Global Christian Relief tentetsü atema Open Doors organization toktsüogo.

January ita mezüng anogo nung Global Christian Relief-i twitter ajanga, Open Doors US nungja melenshiogo, ta metetdaksü. "Onoki 2023 küm tenzüka nungja tasen melener, Global Christian Relief (GCR)," ta parnoki twitter ajanga metetdaksü.

Alima nung Khristantem aser Arogo reshikangshiba nokdangtsü atema Global Christian Relief tenteter, ta parnokisa metetdaksü.

"Alima nung reshikangshi jenjang nung alir tamanger million aika nungdak peritsütsü aser parnoki Khrista osangtajung prokba nung shilem agitettsü aser Khristai Tenyaba wadang tajungba inyaktettsü nükjidong nung onoki mangdang tuluba ayur," ta parnoki metetdaksü. Global Christian Relief-i parnok indang website ajanga, alima nung reshikangshi tia nung aliba Khristantem tenzüksü atema network tulutiba yanglutsü sentong lir, ta metetdaksü.

"Reshikangshi tia nung aliba kibong tenzüksü atema bendanga agütsüba Khristantem ayongdentsü asoshi onoki mangdang tulu nungdaker; koba ajanga taküm nung temelenshi adokdaksütsü aser taruba küm 50 tsüngda Tsüngrem yimli ulushitettsü," ta parnok indang website nungji

shia lir. "Ibayongji January 1 nü onoki nungja melena Global Christian Relief ta amshir," ta parnokisa metetdaksü.

Open Doors US-i, Open Doors international network ya organization tasenba (Global Christian Relief) denji affiliate süa mali, ta metetdaksü.

Alima nung reshikangshi tia nung aliba Arogo tenzüksü nükjidong nung 1955 küm Open Doors tenteta liasü aser tangbo iba organization ya linük 70 dak tema nung lir.

Open Doors tentetsang, Andrew van der Bijl yaküm September ita nung süogo.

Open Doors USA CEO, David Curry-i Open Doors toktsüba sülen Open Doors US nung khenpiga atema CEO inyaktsü atema taoba mapang Open Doors UK & Ireland CEO, Lisa Pearce shimogo.

Open Doors-i sangdong ka ajanga, "US nung Open Doors organization maneni alitsü aser iba telok tentetsang asür, Brother Andrew mangdang ataloktsütsü atema onoki maneni reshikangshi tia nung aliba Khristantem tenzüksü," ta metetdaksü.

"Onoki linük balala nung Arogotem aser underground Arogotem tenzüksü. Taküm küm reshikangshi tia nung aliba Khristan aianu aser adianutem tenzüksü atema onok atema maangka tulu lir. Tesüiba küm 65 tsüngda linük balala nung onoki networks junga amenokogo," ta Pearce-i ashi.

Open Doors-i maneni küm

shia adokba World Watch List sayatsü; parnoki küm shia alima nung Khristantem alitsü majungba linük tamajungtiba 50 sangdonger. Open Doors Watch List 30bubaji taküm January 18 nü sangdongtsü.

# ANOGO ABEN TSÜNGREM DEN

## Shibai Nüka Atar (T.Ken 59: 1-17)

Kodang asenok hoteli odir, hotel nung inyakertemi asenok nüka atar. Parnoki asenok memetet aser asenokia parnok meteta mali, saka parnoki asenok teti metetta ali ama repranga nüka alir aser asen nungdak aseni meshiba ajak parnoki bener arutsür.

Iba ken nung Dawidi Sauler nisungtemi par ki nüka aliba indang zülu. Parnoki pa pur tepsetnü. Saka Dawid Kibuba nung pelaa liasü. Lendong mapang ka nung pa ken tena liasü. Aser taochi asoshi pai Kibuba dang ayimten.

Tsüngremi na atema kechi inyak iba jagi Tsüngremji kechi aji mulungtettsür. "Saka nibo ne tashi indang atentsü" (t.16). Dawidi Tsüngremji tashi Tsüngrem ta metetta liasü. Sauli pa matsüngtoktettsü. "Ne taochi asoshi ni tashi agi ken atentsü" (t.16). Ajak dak alia Dawidi aji nungdaka liasü. Tsüngrem taochi asenok anogo tepiyong sottsü asoshi asenoki sarasademtsü nungdak. Dawidi anepdang taochi angu (t.16). Kibuba dang ken tena aser Pa taochi dangi oa nü anogo tenzükanag.

"Oh kü tashi, ni nü nungsang ken atentsü, Oh Tsüngrem, na kü mitsa, kü dang meimba Tsüngrem" (t.17). Item otem jenokdak aser temulung lemtsü otem lir. Kodang Tsüngrem nü Ain südir, kodang Tsüngremi ne nem taochi agütsüdir, kodang Tsüngrem ne Tashi aser Jenokdak südir, idangji nai tsükchir ajak den ajuruteptetsü. Nai tia ajak ajurutetsü, kechiaser Tsüngremi item ajak ajanga na anüktsü.

Tsüngremi ne tamang yari langzüksü aser Pa taochi agi na wabangtsü. Lendong mapang nung ken tentetsüsa ne tamang asü? Asüng nai tetsübuttsü tensa ajurudang, Kibuba dak amangang. Pai na wabangtsü aser ne tsükchirtem nungi na kümzüksü.

# Chhattisgarh nung Tenla ki raksatsür nisung pongu puogo



Chhattisgarh kübok Narayanpur district nung tribal nisungtemi Tenla amakdang tangokba noksa nung angur.

**January 05, 2023:** Chhattisgarh kübok Narayanpur district nung Tenla ki ka raksatsüba ken o nung Mongolbarnü (January 3, 2023) Police-i nisung pongu puogo; nisung pongu rongnungji district nung Bharatiya Janata Party (BJP) Tir densema lir.

Narayanpur district nung aliba Tenla kidangji tribal nisungtem tamangba yimsü meyipdaksür, ta tai tonglokja Tenla kiji raksaja liasü.

Police-i Indian Penal Code (IPC) kübok Arrla 153 (a)

(tamangba yimsü nung ajemdaker lokti balala tsüngda tsükchi tendaktsüba), Arrla 295 (yimsü ka mezüngmeshitsü nükjidong nung tekülem ki raksatsüba), Arrla 147 (kiojen raksatsüba atema temerenshi), Arrla 148 (nisung tepsetba hadir amshiba) aser Arrla 149 (ozüng alema inyaktsü nükjidong yur ozüng alema adenshiba) ozüngtem kübok parnok anema ken o benokogo.

Tenla ki raksatsüba ken o nung tai tonglokja alirtemji Ladhakshya Roopsaye, Ankit

(tamangba yimsü nung Nandi, Atul Netaam aser Domend Yadav nung lir ta jangjaogo aser parnok ajak magistrate court matsüngdangi anir ao.

Tenla ki raksatsüba mapang nungji lokti aziüktsü meranger police officer kata yirua liasü.

December 31, 2022 aonung tribal nisungtemi, Khristantemi tribal nisungtem Khristan yimsü dangi meyipdaksür, ta tai tonglokja longkak aita liasü, iba sülen tribal yimsü amangertem ser tribal Khristantem tsüngda raratepa liasü.

AO OSHI ANGAZÜKDAK: TANÜ ANGAZÜKTSÜBA OJANG

Ongbanglu (n) yim anasa anameta aliba lu (field nearby village) \* Ongbanglu nung tsük aika aro Ongdang (n) tenem ana tsüngda ali telemok tesem (saddle) \* Onok yim kati aodang ong dang ka ajanga ao.

OLONG PAITEP # 6391

Grid for OLONG PAITEP # 6391 with numbers 1-16 in various cells.

TIPILEN and LANGTSÜNGLEN lists for OLONG PAITEP # 6391.

TIPILEN and LANGTSÜNGLEN lists for OLONG PAITEP # 6390 TELANGZÜBA.

ALOKBA TELOK KA NUNG TENER TEYAK ASANGER. Kiyonger: Anük, mapang talang ka mangur ato, koda asü? Alokba: Aeeesh, ni memelung yonga kanga mepishiji telok ka nung atentsüsa kümer khenyongi mazünger aja, ano metener Saab menden agütsüjito. Kiyonger: Kanga junger, nai kibong mashishiji to, nür tantsübo tanur pungu schooli yoka chiyunga mesürji kangasa okronger ako, oda kiyonger ajaki yaria dang aruogo, na temolung tangangma. Alokba: Hauja, oda Saab menden nung amenerjito, koda masüa. Oko langka asüngdangdi, asen kiyongera Relief jang tera sosta nung ayoker meteta lira shiangma. Kiyonger: Waa, Saab-isa Relief jang bushir? Alokba: Saab asüyonga taila Saab aja onok ya. Kiyonger: Oh Alokba! Lilir: WhatsApp

Tepela Tasoba Anogo. Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jella e-mail: tiriyim@gmail.com nung yokang mesüra Tir Yimyim bureau tem nung agüjang. 1. Tenüng, 2. Tasoba anogo, 3. Küm, 4. Class, 5. School, 6. Talidak, 7. Salem osang.

Tripura: Amit Shah-i BJP tanaben shimtsü ayongzük



Amit Shah-i North Tripura district kübok Dharmanagar nung Jana Biswas Yatra tenzüksüba noksa angur.

Agartala, Aenjeti/January 5 (Agencies): Union home minister Amit Shah-i Brehostibarnü North Tripura district kübok Dharmanagar nung Jana Biswas Yatra tenzüksüba sülen state nung aliba nübürtem dang Tripura nung tanabuba term atema BJP nem vote agütsütsü ayongzüka liasü. Amit Shah-i, Tripura nung BJP nem vote agüja tanabuba term bendaktsütsüji kanga tongtibang, ajita asünungdang state nung terenlok maparen balala kecha tetsükdaksü makai inyakyonga otettsü, ta ashi.

Rally tulu ka nung o jembiba mapang Amit Shah-i, Tripura nung BJP sorkari yimsüsüba nung ochi mashi inyakyim ajak raktokogo, ta ashi.

Pai ashiba agi, taoba küm pongu tsüngda Tripura nung BJP sorkari lokti ajak atema inyakogo aser iba ajanga ajaki reprangtetsüsa temelenshi adokogo.

"Linük nung Congress pur tasü kümogo aser communist pur sama odar, saka parnoki Narendra Modi-i lenisüba nung nübürtemi shimba sorkar tsükdakja sorkar kümtettsü

atema pongmang pongmanger," ta Amit Shah-i ashi.

"BJP yimsüsüba kübok tribal tema parnok temeden meyipa nguogo. Bru nunger lakh 34 küm 25 tashi timtema aruba tembangogo, NLFT den yimjung atema tenangzüktepa yangluba sülen Tripura yimjung nung lir, infrastructure aser investment jenjang tasen ka nung lir," ta pai ashi.

Kasa mapang nung Manipur sorkari state kübok union home minister Amit Shah-i semdangtsü aliba district asem nung drone aser Unmanned Aerial vehicles (UAVs) tem mamshitsü atema tenokdangba agütsüogo.

Amit Shah-i, Imphal West, Bishnupur aser Churachandpur district tem semdangtsü, kong pai project balala semzüksütsü asoshi sentong yanglua lir.

Tenokdangba agütsüba ya Brehostibarnü (January 5) 4:30 nungi tenzükogo.

Union home minister Amit Shah ya India Air Force (IAF) indang tayimtsü ka nung mener January 6 nü Imphal tonga arutsü, ta official source kati metetdaksü.

Imphal West district nung

Imphal International Airport nungi Kangla Park tashi aser Imphal yimti kübok tongtibang tesemtem nung January 5 nü nikonngtsütsü 4:30 ako nungi January 6 nü pai state toktsür mao tashi drone aser UAV tem amshitsü atema memelatsü.

Bishnupur district magistrate Lourebam Bikram-i sangdong ka ajanga, Torbung nungi INA HQ, Moirang; Chengei Lampak, Moirang tashi nung NH-2 telongtet km ka aser Chengei Lampak nungi Ngangkhalawai Helipad Ground tashi nung Drone aser UAV tem amshitsü memelatsü ta metetdaksüogo.

Kasaji Churachandpur district nunga Manipur sorkari Amit Shah senzütsüba lenmang densema tesem balala nung drones aser UAV tem mamshitsü atema tenokdangba agütsüogo.

Iba den bendenloksema union home minister senzütsü aliba lenmang nung nung gari aser kisü dang amshiba oset nangdena alibatem ajak agintsü tetuyuba agütsüogo. Tetuyuba sülen manidakertem anema police-i jenjang tapet agütsü, ta kasa tetuyuba nung shia lir.

Duliajan: Aiür chanu ka pur aoba ken o nung nisung 3 puogo

Dibrugarh, Aenjeti/January 5 (Agencies): Assam kübok Dibrugarh district nung police-i, Duliajan nungi aiür chanu ka pur aoba ken o dak sendakba nung nisung asem puogo.

Ajisüaka aija alir rongnung tongtiba Jahidul Ali tang tashi jenshia senzüdar.

Dibrugarh district police-i, aija alirtem rongnung tongtiba adianu Bodiul Jamal, pa tebu Abdul Jalil aser teko Babu Ali nunger puogo.

Temetettsükaji Dibrugarh district kübok Duliajan nungi pur aoba aiür chanula ya Bongaigaon district nungi police temi kümzükogo.

Arishi küm 17 tain aiür la ya Bongaigaon district kübok Char tesem ka nungi police temi kümzüka liasü.

"Duliajan nungi pur aoba aiür chanula ya Bongaigaon nung lia kümzükogo aser lar kinungertem den yakta longjemdaksütsü," ta Assam police special DG, GP Singh-i metetdaksü.

Tetsürla tebu yagi January 1 nü Duliajan police station nung tashishiba ka benoka liasü.

"Ozü jala December 31 nü tuition atema Gogoi market-i ao, ajisüaka la meyipa maru. Lai phone dena magizüker," ta

tetsürla tebu Bharat Agarwal-i FIR nung shia lir.

Tetsürla pur aosang ya Jahidul Ali ta jangjaogo, shiba Assam kübok Barpeta district nungi lir.

Bharat Agarwal-i ashiba agi, Jahidul Ali-i par jala pur ao kechiyong pa kasa anogo samatok.

Ajisüaka Bharat Agarwal-i Ken o benokba nung Jahidul Ali indang tenüng shisema mali.

Kasa mapang nung Assam chief minister Himanta Biswa Sarma-i, Dibrugarh police dang aiür chanula pur aoba ken o bushisüngdangtsü atema tetuyuba agüja liasü.

Manipur nung telungpur lenir ana khaset

Imphal, Aenjeti/January 5 (Agencies): Manipur kübok Churachandpur district nung Myanmar den arrtsü nung aliba Vangli yimtsüng nung Bodhbarnü Manipur nung amendaker aliba telungpur telok ka nungi lenir ana khaseter lia ngutetogo, ta ketdangsurtemi Brehostibarnü metetdaksü. Indo-Myanmar arrtsü nung

aliba Vangli aser Khenman yimtsüng nung alirtemi India tsütsülen Bodhbarnü nikonngtsütsü 2:30 ako shi nung prangbong akhaba ola angashia liasü, ta source-i ashi.

Mapang tatsüka lir Vangli yimtsüng nung nisung ana khaseter aliba nguteta liasü, ta kasa sangdong ajanga metetdaksü.

Asür ana ya Yaiphaba aser Jirilakpa ta jangjaogo aser tena ya UNLF telok nung lenir liasü.

Yaiphaba ya iba tenokdangba agütsür aliba telok nung self-styled Major ka aser Jirilakpa ya kasa telok nung self-styled Captain ka liasü.

Tena kechiba tepset iba indang osang tang tashi mejangjai lir.

## Palestine nunger tepuokdak talangtiba ayusang Israel-i chiokogo

**Jerusalem, Aenjeti/January 05 (Agencies):** Israel-i Palestine nunger tepuokdak talangtiba ayusang jail nung küm 40 lir chiokogo.

Karim Younis yagi küm asem tejakdang occupied Golan Heights nung Israel sepai Avi Bromberg pua tepset ta 1983 nung aitsü.

Pa ya tepuokdak tejangja nübu ka kuma yimtenren inyakyim indang zülü aser Israel den tezüngzüktep agitsü ajungshia aru.

Younis ya Israel senso agia lir saka Israel indang interior minister-i ibaji meyiba agütsütsü shia liasü.

Iba ya ajanga kiralongra mapa inyaker asoshi tongtipang temaitsü ka akumtsü, ta Aryeh Deri-i ashi.

Younis ya Palestine nübu

aser alima nung 'free people' temaitsü lir, ta Palestine Tir Mahmoud Abbas-i ashi.

Benjong melidaktsütsü mechi Younis ya Israel tiyonglen Raanana jila nung Brehostibarnep züngia lia par kinunger nem osang magütsü chiok, ta Israel nunger osang ajanga ashir.

Iba sülen pa ya northern Israel nung par ki alidak Ara yimtsüng nung kinunger aser tembartemi ajurua liasü aser national security minister Itamar Ben-Gvir-i police dang pa agizükba mita reprangtsü totuyuba agütsü.

Ben-Gvir-i tweet ka nung iba ama nisung ya right-wing sorkar tasenbai kiralongrar nem tasüba temerenshi agütsütsü asoshi ozüng ka meyangludang mezüngmeshia

chioktsüla, ta ashi.

"Küm 40 ya otsütem agi sünga lir, tepuokdak alir indang otsütem aser otsü shia ya linük ka indang otsü lir. Palistan asoshi takum agütsür rongnung ka asüba asoshi ni nüma atanger aser ano Palestine nunger asoshi tali bendanga agütsütsü," ta Younis-i ashi.

Israel nunger tepuokdak nungi Palestine nunger chioktsü asoshi Palestine nunger ajungai aginüba liasü, ta Tir Abbas-i ashi.

Israel nunger tepuokdak Palestine nunger 4,700 shi yua lir aser item rongnung tanur 150 aser administrative detainees 835 lir aser parnok anema ken o mebenok mesüra ken o mejembi, ta Palestinian human rights group Addameer ajanga ashir.

## Pakistan Taliban-i yimten yimsüsür amokmeren

**Islamabad, Aenjeti/January 05 (Agencies):** Telungpur telok Tehreek-e-Taliban Pakistan (TTP) ajanga linük nung tang yimsü tesüdak party temi par anema rara mesüra majungtsü, ta amokmerena liasü.

TTP dang ya Pakistani Taliban ta ajar, kechiaser parnok ya kidanger Afghanistan nung aliba Taliban den tangatetba mesükteper aser parnok Bodhbarnü Ato Kilonser Shehbaz Sharif aser foreign minister Bilawal Bhutto Zardari tenüng amshia liasü.

Sharif ya Pakistan Muslim League-Nawaz (PML-N) indang tir lir aser pa den Bhutto Zardari'er Pakistan People's Party (PPP) ya sorkar nung coalition partners tongtiba lir.

"Mapang talangka TTP ajanga political party anema kecha meinyaki aru. Saka iba party ana ya par tajemdak dak akhanga nokdakra...item party lenir anema mera agitsü. Nüburtem par anasai maotsüla," ta TTP odongtar Muhammad Khorasani-i sangdong ka nung ashi.

"Onüki Pakistan indang security forces dak tenük yoker, shirnoki West-i molungba ama linük tejangraba anema inyaker," ta ashi.

TTP sangdong nungsa Pakistan nung tamangba yimsü nung amendaka aliba political party tem danga tekumdangtsü ashi aser par telok anema inyakba nung shilem magitsü ajungshia liasü.

"TTP sentong nung nenok dak tenük yoktsü densema mali saka onok anema inyaksangshiba nungi pila alitsü mepishir," ta ashi.

Linük nung kiralongraba khenyongi senzüka meyütsütsü aser azüdokshi anema nokdaktsü

temolungtetba akangshir, ta Pakistan security tsütsü tematiba telok, National Security Committee (NSC) ajanga sangdonger anogo ana lir TTP-i amokmerener alitsü.

NSC nungya Sharif aser tang tasenba military chief General Asim Munir nunger ya züngsem lir aser parnok Pakistan nung security tensa asadangtsü asoshi December 30 aser January 2 nü senden mena liasü.

NSC senden mena 2022 küm tembang kong taoba küm TTP-i linük tesem balala nung lendong 150 shi agüja civilian jenti takum samatsü.

TTP yagi Islamic law tesashiba benoktsü asoshi rarar aser Pakistan indang tribal area tem northwestern Khyber Pakhtunkhwa province den loktepa lemsatsü meranger ta ashir.

November ita iba telungpur telok yagi Afghan Taliban tetsüngtai ia sorkar den ceasefire tezüngzüktep yanglua aliba par sasa tembanga par sepaitem dang tali azdokshitsü totuyuba agüja liasü. Taliban-i Afghan li nung TTP lenirtem jenokdaktsü, ta Islamabad-i aiben jembia arur saka Kabul-i magizüker.

Bodhbarnü sangdong nung Pakistan indang ruling coalition ya United States tejangraba nung inyaker, ta TTP-i aija liasü. Ato Kilonser Sharif-i America nunger peladaktsütsü meranga TTP anema rara sangdong, ta parnok ashi.

"Tia maka tang aliba sorkar kodaser United States of America küboki aitar mejangja," ta ashi.

Mongulbarnü US-i Pakistan indang NSC sangdong busemba metetdaktsü aser kiralongra nungi kumzüka alitsü par temeden lir ta shia liasü.

Mongulbarnü osangbener senden ka nung jembidang US State Department odongtar Ned Price dang TTP samatsütsü asoshi Pakistan-i Afghanistan telung nung military operations tenzüktsü asü, ta asüngdanga liasü.

Iba mapang, linük balala amaktsü asoshi Afghan li amshitsü memelatsü ta Afghan Taliban-i nangzükba ama inyaksüla, ta Price-i shia liasü.

"Item ya tanü tashi Taliban-i nangzükba tem rongnung meinyakteti mesüra inyaksü memolungi aruba rongnung densema lir," ta pai ashi.

Ajisüaka Afghan Taliban-i itemji khenyongi magizüker. Mongulbarnü sangdong ka nung, Pakistan mesüra danga linük anema Afghanistan litsü mamshi aser item taitüba ya tamendak dak maka aser rara mesüba o lir, ta par odongtari shia liasü.

TTP sangdong nung foreign minister Bhutto Zardari-i tetsü tzüraba sünemdaktsütsü meranga America ya tetsü ta sangdong, ta ashi.

Bhutto Zardari tetsü aser taoba ato kilonser Benazir Bhutto ya 2007 küm Rawalpindi yimti nung election rally mapang TTP nisungi tepset ta tai tonglokja lir.

Iba atema taoba TTP lenir Baitullah Mehsud sen sendaktepa alir nisung pungi apu. Aser 2017 küm kuli tejangja peria mongutetba ajanga parnok nem temeden agütsü saka danga ken o nung aija tepuokdak yua lir.

2018 küm tang TTP lenir Mufti Noor Wali Mehsud-i pa indang kakat British Raj to American Imperialism nung par teloki Bhutto dak lendong agütsü, kechiaser la shimtetra par telok dak tenük yoktsü nangzükba liasü, ta shia liasü.

## Tsüngremer temoatsü nung arishi küm 80 ajungba tepela



REV. I. SOWA  
6th January 2023

"Kibubai na moajang aser nüka liang, Kibubai pa tejak ne dak yalokjang aser ne dang yimlibilem sayuang, Kibuba tejak ne tsütsü meyipdakjang, ne nem tesünep agüjang".

*Temeim Kinungtsü, Chirnurtem,  
Anük-amortem aser Semchirtem.*

## KÜMREM PELASETER

"Aser Tsüngrem meimertem shirnok pai mulungba ama ja-a lir, parnok tsüngdang mapa ajak külemi tajung asoshi inyakteper ta asenoki metet" - Rom 8:28



10.10.1964 - 25.12.2022

Asür Mrs. NUNGSANGKALA (UNGER) akümlidang Tsüngrem tsüngnep maitsü jajaba aser asen Teyanglur nüksaklok taküm iba lima nung la wadang temer pilar tanü ozü taku marok lemsatepba kwinakati sarasadem, nübu aser rongsen aki nungita yariogo, nenok ajak dangi temulungjang taroktiba aki kümrem pelaba aser ozü mulung aneba lemsatepba metetdaktsü. Molamushia akasang Tsüngremi nenok kija, kibong aser lokti tentet ajak moajangni ta sarasadem.

*~ Temeim Kinungbo, Jala, Jabaso aser Semchir.*

## MULUNGEN O



ASO :  
20/03/1945

ASÜ :  
20/12/2022

Onoki teti meima aliba Temeim Ojala Asür Rongsenmenla (Dibuia), shirang yipden nung aliba mapang nungi akümüli tembangba anogo tashi onok mangyim jashi nung alidang Lenjem Hospital, doctor, nurses, MTBA, Dilong Ward yimden aser kiyongertem, Dibuia yimden Mokochung, yimer yimsanger tesem balala nung alirtem, Dibuia Baptist Arogo anaprongla, anükapang, sosemtem, kinungertem aser la dang meimer tulu tila shirnokisa onok mulung zürep mapang, nübu, rongsen aser sarasadem agi yaritepogo, nenok ajak dang pelaba lemsateper. Nenok mapa tajung aser temeim onoki kodanga mamatsü. Teyanglur Tsüngremi nenok taküm talubosa moajangma.

*~ Temeim Chirnur, Semchisemnur,  
Anükapang, kinunger adianutem*

## MONGSENYIMTI KAKETSHIR TELONGJEM (MKT), MONGSENYIMTI Lucky Draw Result

In Aid of LKM 2023

Date of Draw : 5th Jan. 2023

Winner : Ticket No. 047

Winner must claimed their prize by producing the original ticket within 7 days after the declaration of result.

# Asia Cup 2023 September ita asayatsü

**Aenjeti/January 5, 2023 (Agencies):** Asian Cricket Council (ACC)-i Bresthostibarnü sangdong ka ajanga Asia Cup 2023 September ita asayatsü ta metetdaksüogo.

Iba asayamung ya 50-over format nung asayatsü. Iba asayamung ya koba linük nung ayongzüka asayatsü, iba indang tang tashi sangdonga mali.

Taküm Asia Cup ya Pakistan nung ayongzüka asayatsü liasü, ajisüaka linük ana tsüngda yimden yimsüsüba nung mangatettep aliba ajanga BCCI-i Pakistan nung oa masayaner.

BCCI-i Pakistan nung Asia Cup masayatsü nokdakba ya taoba Pakistan Cricket Board (PCB) mendenbuba Ramiz Raja-i aitsüogo aser India nung asayatsü aliba 50-over World Cup nung Pakistan-i shilem magitsü amokmerena liasü.

Ajisüaka PCB nung

temelenshi adoka Raja melena Najam Sethi shimba sülen osang tajung karbo angashitsü imlar.

Asia Cup 2023 nung team trok asayatsü, kong India, Pakistan, Sri Lanka, Bangladesh, Afghanistan aser qualifier team ka densema alitsü.

Taoba Asia Cup UAE nung asayaba mapang Sri Lanka-i final asaya nung Pakistan koka liasü. UAE nung asayaba Asia Cup ya T20 format nung asaya kechiyong iba asayamung temer Australia nung ICC T20 World Cup asayatsü liasü.

India nung taküm küm tatemlen ODI World Cup ayongzüka asayatsü lir aser team tem ajak 50-over format dak rangloker lir asünung taküm Asia Cup ya iba format nunga asayatsü.

BCCI secretary aser ACC tir Jay Shah-i taruba küm ana atema calendar sayaba mapang

ashiba agi, "asayamung mapalem balala ajanga iba asaya jenjang tasen ka dangi anitsü onok temulungtetba aliba sayur. Linük balala nung cricket asayatem kanga junga asayatsü atema renemshiba mapang cricket asaya atema iba ya mapang tajung ka asütsü ta ni nangzüker."

Küm ana tsüngda ODI aser T20I 145 asayatsü renema aliba ACC-i sangdongogo. 2023 küm asaya 75 aser 2024 küm asaya 70 asayatsü.

Maneni Emerging (U23) Asia Cup-a asayatsü aser iba asayamung ya taküm July ita 50-over format nung team ti asayatsü. Kasa asayamung ya taruba küm December nung asayatsü saka T20 format nung asayatsü.

Taküm women's Emerging Asia Cup June ita asayatsü. Iba asayamung nung T20 format nung team ti asayatsü.

# 47buba Late Imtimeren Memorial Open Trophy tenzükogo



**Aenjeti/January 5, 2022 (TYO):** Longsa Sports Association-i küm shia ayongzüka asayaba 47buba Late Imtimeren Memorial Open Trophy tanü Longsa yimtsüng kübok Salang Lenden nung tenzükogo.

Asayamung lapokba sentong nung Secretary, Mokochung District Volleyball Association (MDVA) Saruba alakteta

jaoker liasü. Sentong nung o jembiba mapang alakteta jaokeri asayamung nung shilem agia aliba team tem aser asayatem dang taküm azüoka alitsü atema takok tashi meranga inyaksangshitsü ajungshi.

Iba asayamung nung tanga district nungi team asem densema team 8-i shilem agidar. Iba asayamung ya January 6 nü tembangtsü.

# Prannoy & Sindhu nati ang Badminton Asia Mixed Team Championships asayatsü

**Aenjeti/January 5, 2023 (Agencies):** World No. 8 HS Prannoy aser Commonwealth Games gold medallist PV Sindhu nati anir India team taruba Badminton Asia Mixed Team Championships nung asayatsü. Iba asayamung ya Dubai nung February 14 nungi 19 tashi asayatsü.

Badminton Association of India-i taoba mapang ama temaba jenjang nung asayatem iba asayamung atema indang indanga shimogo aser asayamung nung tanga linüktem den toktepa asayatsü atema team tajung ka shimtsü asoshi squad nung tanungba asayatem atema trials agia liasü.

2021 küm iba asayamung

ya Covid wara poktetba ajanga masayateti liasü.

French Open champions Satwiksairaj Rankireddy aser Chirag Shetty nati anir tebur tarep asaya asayatsü. Team nung Krishna Prasad G aser Vishnuvardhan Goud na tanabuba tarep asütsü.

"Onoki team tajungtiba den akoktsüsa team tashi tait ka shimogo. India tebur team-i taoba küm Thomas Cup asayaba mapang, parnoki junga asayatetba nü koma asayateter aji sayuogo aser iba asayamung nunga team-i takok tajung angutsü ta temulung lema bilemer," ta Badminton Association of India secretary Sanjay Mishra-i ashi.

Tetsür tarep asaya nung All

England semi-finalists Gayatri Gopichand aser Treesa Jolly na asayatsü aser Ishaan Bhatnagar aser Tanisha Castro na tarep temeyoktep asaya nung asayatsü imlar.

### India squad:

**Men's Singles:** Lakshya Sen & HS Prannoy

**Women's Singles:** PV Sindhu & Aakarshi Kashyap

**Men's Doubles:** Satwiksairaj Ranikreddy & Chirag Shetty; Krishna Prasad Garga / Vishnuvardhan Goud P

**Women's doubles:** Treesa Jolly/Gayatri Gopichand Ashwini Bhat/Shikha Gautam

**Mixed Doubles:** Ishaan Bhatnagar / Tanisha Crasto.

# Bhupinder PL nung mezüngbuba Sikh nunger assistant referee kümogo



**Aenjeti/January 5, 2022 (Agencies):** Top-flight English club football tetoktepa, Premier League nung Bodhbarnü mezüngbuba Sikh nunger assistant referee kati shilem agiogo. Southampton indang home ground St Mary's nung Nottingham Forest den asayaba mapang Bhupinder Singh Gill-i assistant referee shilem agiba nguogo.

Football asaya ya Bhupinder indang taküm nung shilem ka lir. Pa tebu Jarnail Singh ya English league nung mezüngbuba Sikh nunger referee lir aser teti Sunny-a tebu tsüngsü nung anidaka referee kümogo.

"Iba ya kü indang career nung ajak dang tajungtiba mapang lir, saka iba yagi ni mayipshidaktsür, kechiyong kü nükjidong atongtsü atema iba ya

jenjang ka dang lir," ta Bhupinder-i osangbenertem dang ashi.

"Iba ajanga refereeing course agitsü aser asaya achaayangtsü atema taruba putu jangra kümdaktsütsü asoshi ajungmesoba nung teyari agütsütsü imlar," ta pai ashi.

"Ni temaba jenjang atongtsü atema nükjidong ayu aser tarutsü nung official tem atema nükkrangdong ka akümtsü aser ni ama South Asian nungi nüburtem asaya official akümtsü atema ajungmesotsü kü nükjidong liasü," ta pai ashi.

Tebu Jarnail-i 2004 nungi 2010 tsüngda Football League (EFL) nung asaya 150 dak tema achaayangogo aser teti Sunny-a EFL nung referee ka lir. Ajisüaka Bhupinder ya jenjang ka tejakdangi tua Premier League official ka kümogo.

# ISL: North East United FC-i Hira Mondal anisemogo

**Aenjeti/January 5, 2023 (Agencies):** Indian Super League (ISL) club NorthEast United FC-i Bodhbarnü sangdong ka ajanga defender Hira Mondal den tenangzüktepa yangluba sangdongogo.

Mondal ya Bengaluru FC nung shilem ka liasü, saka November ita tangatettep nung club toktsü aser club ka nung danga züngoksema maliasü.

NorthEast United FC nung left-back position nung asayatsü atema Mondal ya Tondonba Singh aser Gurjinder Kumar na den tokteptsü. Season takok nung tembangtsü atema inyaktepba mapang ka nung Mondal anisemba ajanga defence tajangba akümtsü atema Highlanders pur timla alitsü.

Arishi küm 26 tain asayar shiba fill-back ka saka tejakdangi tua asayatsü janngar pa ya Santosh Trophy nung West Bengal nungi kanga junga asayaba aser 2020-21 I-League nung Mohammedan SC nungi kanga junga asayaba ajanga nungtugu aküm. Pa I-League Team of the Season nung züngoksema liasü. Mohammedan SC nungi

kanga junga asayaba sülen pa East Bengal FC nung aden aser taoba season par team ponglang nung tembangaka pa kanga tongtibang asayar ka liasü. Pa team tenüng nungi 16 ben asaya aser defence aser attack naprongla nung tongtibang shilem agia liasü.

East Bengal FC nungi kanga junga asayaba sülen pa ya ajaki aginüa aküm aser ISL 2022-23 season metenzük tsüngda Bengaluru FC puri alizüka liasü.

Mondal ya ISL season metenzük tsüngda Bengaluru FC nungi Durand Cup nung asaya pezü nung shilem agia liasü aser parnoki iba asayamung akok. Ajisüaka pa tang asaya aliba ISL season nung Bengaluru FC nungi asayatsü atema khen danga maongka mangu.

Vincenzo Annese-i anir Guwahati nung amendaker aliba team ya iba season goal 33 tashi chia lir aser parnok dang ISL point table nung ponglang nung lir. Asaya ti dang asayatsü anunga lia NorthEast United FC puri takok tashi asaya ajak koka last four ajanga tur asayamung tembangtsü nungdaka kümogo.

**BILEMDANGANG**  
"Nai na meimdaktsünura bilemra, mezüng tangar meimang."